

Opuscula

Opuntia

HEROICA

24
25

Virtutum & meritorum,

VESTIGIA,

AB

ILLVSTRISSIMO OLIM ET MAGNIFICO DOMINO,

D. PRÆCLAO
STEPHANO

IN SLUPOW

SZEMBEEK,

CASTELLANO WOYNICENSI, &c.

Dum per Appiam mortalitatis, ad Capitolium Æternita-
tis progredieretur,

EXPRESSA,

Omnibusq; ad imitandum,

GENTILITIIS ROSIS

CONSIGNATA,

ac, dum Eidem

Iusta Parentalia,

Cracoviæ, in Ecclesia S. CASIMIRI,

RR. PP. Ordinis Minorum, Strictioris Observantiæ Reformato-
rum, magno omnium dolore persolverentur,

M. SAMUELE PODGURSKI,

Phil. Doct. & Professore, C. M. S. ADALBERTI in Circulo

Crac. Præposito, S. R. M. Secretario,

Dolenti calamo,

In memoriam tanti Senatoris,

DELINEATA.

Anno Christi, 1702. Die 27. Aprilis.

CRACOVIAE, TYPIS UNIVERSITATIS.

IN STEMMATA
ILLVSTRISSIMI OLIM ET MA-
GNIFICI DOMINI.



*Gratia quàm florum brevis est, præceptusq; rapina?
Ab dum pubescunt, consenuere ROSÆ!*

Mund. Symb.

*Attamen arma inter, festinatosq; labores,
Dulcis adhuc visu, niveo natat ignis in ore
Purpureus.*

Stat. lib. I. Achil.

*Scilicet adversis probitas exercita rebus,
Tristi materiam tempore laudis habet.*

Ovid.

ILLVSTRISSIMO & REVERENDISSIMO DOMINO,

D. STANISLAO

A S L U P O W

S Z E M B E K,

DEI, & Sanctæ Sedis Apostolicæ Gratiâ,

EPISCOPO VLADISLAVIENSI,

& POMERANIÆ,

Mæstissimo Inferiarum Fraternalium

P R Æ S T I T I.



Arentale hoc Epicedium & lugubres Nænias, dolentis animi ex obitu tanti Senatoris monumentum, quod Niobe Academica, non tam sepiâ, quàm irriguis lachrymis exaravit; cum formidine (ingenuè fateor) Tibi Hospiti Gratissimo offero. ILLVSTRISSIME, & REVERENDISSIME DOMINE. Quippe cùm anno lubilei Magni, Christianæ lætitiæ natali, jubilum Tibi gratulationis, inter festiva tripudiantis Poloniæ gaudia, ad solemnem Pontificatûs Tui ingressum cecinerim; & nonnisi hilariorum auspex & apprecator fieri optaverim; hodie acerbitate fatorum impulsus, novoq; doloris cæstro percitus, quasi mente confusâ, ac in quendam stuporem raptâ, etiam hanc exilem tristium pagellam Celsissimo Nomini Tuo, audeo dedicare: quo factò, infandum

Tibi magis renovare dolorem, & recentissimum vulnus, vulnere sanare contendo. Si enim Respublica nostra, in tanto rerum turbine, cadentibus in tam brevi temporis spatio, suis Statoribus gembunda, amisso quoque hoc Lumine & Columine suo, Tragicum præferat squallorem; quantus Tua viscera lancinat mæror, qui in Fratre dilectissimo, dimidio animæ orbatus es. Maeste tamen animo, Mœstissime PRÆSVL, & Senator Dignissime, spirantem solas Gratias vultum, Clientali obsequio non denega: imò æqui bonique consule; quod ad probandam stabilitatem suam in prosperis & tristibus, (sic enim humana voluntur) sincerè, & candore Academico, Præcelsæ Domui Tuæ famuletur. Divisus inter plures dolor, lenior erit Tyrannus; & minus feriet fraterna præcordia; si illius vires, mutuâ participatione, fuerint imminutæ. Imò mœstorum verus consolator DEVS, faustiores concedet vices; quibus, hic Autumnus in Vere, qui Gentilitias ROSAS Tuas deprædatus est, Elisijs gaudiorum perpetuis compensabitur. Quod cum longæva valetudine, & maximorum in Ecclesia DEI augmento honorum medullitus precatur.

ILLVSTRIS: & REVEREN: DOMINATIONIS TVÆ,

infimus Client,

M. SAMVEL IOANNES PODGVRSKI.

VESTIGIUM I.

Magnorum Aborigenum non jactatio,
sed imitatio.

*Perire omnem nobilitatis adorem in illo,
Cujus laus est in origine sola,*
pridem arcanum veritatis aperuit Claudianus.

Aurora præcelli Sanguinis,
licet Natalis diei aurea hora sit;
parum tamen sereni adfert, sine sole virtutis.

*Dives nè prisco ab Inacho natus,,
cum orbe Majores censueris, nil interest;
si dedecorent bene nata culpa.*

Capacissimas Prosapiarum tabulas,
Spatiosa Aborigenum Nomina,
quid ostentare juvat?

si probitatis Numen nullum habeat Larem.

Inglorium sanè est,
stantes in Curribus jactare Æmilianos,
& tamen in præceptis ruere vitiorum.

Joves ipsos novimus;
in luco Idæ minus lucis habuisse;
donec in virtute adoleuerint.

Scilicet hæc Diva, vera Cybele est, Mater Divorum,
quæ sola, castos laudatores sui habet Corybantes.

*Adeo, nisi marmorei Cecropidæ, truncoq; simillimi Hermæ
audire velimus,*

Majorum virtutes non jactare, sed imitari necessum est.

Talem Iovem Statorem nacta fueras

Præcella SZEMBECIORVM Prosapia,

Illustrissimum olim & Magnificum Dominum,

D. PRÆCLAVM STEPHANVM

in Słupow

S Z E M B E K

Castellanum Woynicensem, &c &c.

Senatorem æternâ memoriâ Dignissimum:

B

Quid-

Quidquid in Europa, gesserunt SZEMBECH Heròes,
legem suæ virtutis reputavit.

Quot Majores, tot ad rectefacta Hortatores,
vel ex elingui marmore, audire sibi visus est.

*Factis nempe immortalibus loquuntur Heròes,
licet in mortis conticinio jaceant, taceantq̃.*

Primus Isti Ascanio Æneas,
illud Heroicum insusurrauit monitum,

Disce puer virtutem ex me verumq̃ laborem:

GERLACUS à SCHEMBECK
Familiæ Proauctor.

CAROLUS MAGNUS,

Imperij Occidentalis Instaurator,

imò Oriens Occidentis,

Hunc invictum Bellatorem,

primus Aquisgrani, Insigni ROSARUM, coronavit.

Crevit posthac celsum ROSARUM Germen,

usq̃; ad HENRICUM VII. Imp: Roman:

Tandem extinctura hostilis cruoris,

Augustiorem Honorum Muricem sortitum est,

per **CAROLUM IV.**

Firmavit magis radicem FLORUM PETRVS,

Dante influentiam favoris,

MAXIMILIANO I.

Porro Progenies PETRI,

HENRICVS Tyrolis, **PETRVS** Prussiz, **EDVARDVS**

& **BARTHOLOMÆVS** Marchiz,

Gentilitijs FLORIBUS Nobiliora Tempe elegerunt.

Hic applaude Tibi Polonia,

cujus laurigeris campis,

sui Nominis Monarcha,

SIGISMVNDVS AVGVSTVS,

SZEMBECIAS ROSAS implantavit.

BARTHOLOMÆO quoq̃; **SZEMBEK** superioris Filio debes,

Quòd Gentilitios FLORES,

in solo Tuo fieri curaverit Indigenas.

Tergeminus Frutex,

totidem auctus honoribus, in **NICOLAO, STANISLAO,**

& **IOANNE SZEMBECIIS,**

reflo-

refloruit tandem in immensum,
in HIERONYMO & ALEXANDRO.
Quos Moldavicz, Sudermanicz, Moschoviticz Victoriæ;

Sarmaticos prædicant Scipiadas:
solum Smolenscum nefasti nominis fuliginæ,
occumbentem infuscare voluit ALEXANDRVM.

Sed Lucis Filia Virtus Bellatorum,
magis refulget in occasu.
Felicior surrexit in Culmen gloriæ tantus Heros,
cùm sic ceciderit, ut Patria staret.

Verùm hîc attende calame,
Quàm nobile triumphî genus exhibuerunt
Bizantini, Tauricani, Moschovitici Triumphatores,
SIGISMVNDVS & VLADISLAVS,

Qui devictis hostibus,
Animos GABRIELIS, STANISLAI, CHRISTOPHORI,
PAVLI, & ALEXANDRI SZEMBECIORVM,
novis gratijs devicerunt.

Nempe liberæ Gentis Regnatores,
non aliter libertatem Civium mancipant;
quàm beneficijs obligando.

STANISLAI tamen & PAVLI præclaros Cineres,
ROSÆ æternùm coronant,
ex quibus Phœnices SZEMBECIÆ Domûs in Septemtrione videmus.

Vivis adhuc in tot Filijs immortalis,
Illustrissime, & Magnifice Domine,
FRANCISCE in SŁUPOW SZEMBEK,
Castellane Camenecensis.

Pantheon omnium Virtutum pectus Tuum,
Magnus IOANNES admiratus,

Priscam Polonorum integritatem
in Te resedisse autumavit.

Quidquid infandum Cacòéthés nova,
noviq; invexêre Vlisses,
in arce candidæ mentis damnâsti.

Præfectura Becensis, Curulis Sanocensis, tandem Camenecensis,
Lydium te Prudentiæ Lapidem monstravêre.

ODROWAZIORUM

*Cognatam Divis Familiam Tibi junxisti,
ut pote ipse effigies pietatis.*

WIELOPOLSCIANUS SONIPES,

ROSEO Tuo calle cucurrit,
ut Tibi Novos ferret Argyraspidas.

RVPNIOWSCIORM SRZENIAWA, Scamandro felicior,
Heroicum Domui auxit Decus.

In Illustrissimo, & Reverendissimo,

D. STANISLAO à Słupow SZEMBEK,

Episcopo Vladislaviensi, & Pomeraniæ,
Quem Innocentia Vitæ, Apostolicus Zelus,
impensi pro Publico labores,

Apricum niveæ mentis, sanctioris ævi Pontificibus exæquant,
in modum Auroræ, ROSÆ fulgent.

Perillustres, & Reverendissimi Domini,

MICHAEL, & ANTONIUS,

Coronarum Vavelli Uniones,
augent pretium in publico sole probatæ Virtutis.

Referent perennes fasti sinè fastu eminentem,

ILLUSTRISSIMUM IOANNEM REFERENDARIUM REGNI,
GUBERNATOREM BECENSEM, sanioris consilij Phcebum.

Explicat sua Victor arma,

ILLUSTRISSIMUS FRANCISCUS CAPITANEVS BOCHNENSIS,
sub Vexillo Curia Regni, quod magnisprehendit meritis.

Perillustres & Reverendissimus

D. LVDOVICVS CRACOVENSIS & VARMIENSIS CANONICUS.

Verè Canon & Regula probitatis.

ILLUSTRES CHRISTOPHORVS & ALEXANDER,

Fratres Helenæ Lucida fidera,
Ara Divorum, focosq; Patrios, coronare ROSIS
non cessabunt.

Sed PAVLINI Fruticis Surculus,

Illustris STANISLAUS SZEMBEK, Burgravius Crac.
nonnè novam in Sobole Inclyta explicat Hesperiam?
Fefellit sua Vates Cortina;

*è delicato Sanguine natus fuisse ROSAS,
cùm SZEMBECII Purpura Floris,
Odrysio Tauricanoq; cruore rubuerit,
Hostes persecuturus,*

Illustris

Illustris & Magnus D. FRANCISCUS Tribunus Sandomiriensis,
o quot trajecit Rubicones! nil obstantibus monstris.

Quantum erubescit & ipsa pravitas,

Hoc Areopagita jura dante.

Ipsa sub tempus Interregni Caduceum tenente,

Gentilitiae CLIPEI SANDOMIRIENSIS LINEAE,

Veritatis fuere Paralellae.

Hæc Intelligentia Motrix,

SIDERA sui Palatinatus ita direxit,

ut nunquam erratica fuerint.

Perillustris, & Reverendissimus Dominus,

CHRISTOPHORVS ARCHIDIACONVS Pomeraniae,

& Officialis Generalis Gedanensis,

Quoties amore, more & ore Christum circumfert;

toties Orthodoxae veritatis hostes,

Palinodiam canere coguntur.

ILLUSTRIS & MAGNIFICUS D. ANTONIVS Burgravius Crac:

Unionem quidem hausit, sed non Cleopatra:

Quia pretiosior Regno est Unio animorum.

Post hunc Ternionem Fratrum,

Tres iterum Gratias venerare calame,

In IOANNE, CHRISTOPHORO, ADALBERTO.

Hos, nedum emeriti senij, sed etiam mentium candor,

certos honorum fecerat Candidatos.

Ast illis solus ambitus inest meriti, non praemij;

Grandævi suæ Prosapiae Triumviri,

summum honorem rati, DEI honoris causam tueri;

nunquam non captivum intellectum, in obsequio fidei tenuerunt.

Vnde licet omnibus amici,

solis tamen hostibus Augustissimæ TRIADOS,

sic faverant, ut olim Poeni Romanis.

Impurissimi Arianorum & Socinistarum scarabæi,

Ipsorum ROSAS ferre nequeunt,

aut emori, aut diffugere coacti sunt.

Invasor olim Regni Sueticus Leo,

eisdem FLORIBVS coronari peroptaverat;

sed aculeis punctus, vel ipsi Crasso risum fecit.

Nempe armat spina Rosas.

Quantum nominis augmentum assecutus,

C

Magna-

Magnanimus Heros IOSEPHVS!
Quàm dignè Nomen Alexandri gerit ALEXANDER?
qui bellaria Martis sub IABLONOVIO DVCE,
vel ad sterile Camenecum toties collegerunt.
Crescere illis & in faxo Palmæ debuerant;
quibus vigor influxit sanguinis Heroici.
Tantis Heroibus adjungat Fama immortalis,
Sacrum Bellatorem,

Perillustrem & Reverendissimum Dominum,
FRANCISCVM CANONICVM VLADISLAVIENSEM & POSNANIENSEM,
in theatro animorum, sapientiâ & pietate triumphantem.

Produnt Seraphici ignes & Illos SZEMBECIOS,
quibus in Umbris Religiosis latere volupe est.

*Maxima equidem sublimium gloria est,
quàm maximè se submittere:*

At Vos edomitis passionum monstris clari Alcidae,
vel triumphales FRANCISCI manus elevant,
vel Stellatus Carmelus illustrat,
vel ignei PATRIARCHÆ flamma, facit illustres ab umbris.

Vastiores alijs SZEMBECIIS parabit fastos,
Architecta gloriæ Virtus,

Tu levior penna, tenuitatis tuæ conscia, siste gradum.

In Illustrissimo olim & Magnifico D.

D. PRÆCLAO STEPHANO SZEMBEK,

Castellano Woynicensi, &c.

Corona SZEMBECIÆ gentis est,
quot Virtutibus, tot gemmis distincta.
Superbire tamen alieno pretio noluit,
nisi suum addidisset.

Prudentissimus suæ Ithacæ Laërtiades,
propriâ Virtute nomen immortale quæsit.

*Nam ignavorum tantum hac insania est,
ante Iovem & Saturnum Atavos jactare,
& tamen nihil dignum Iove agere.*

VESTIGIUM II.

In arena Palladis & Gradivi,
Seria, & victoriosa negotia.

Lacænas Matres superat Polonia;
dura tolerare suos, à teneris docet.

Palmas ut metere assuescant,
quibus asperior cortex est,
non delicatas manus habere jubet.

Princeps Ales Noster, portandis fulminibus assuetus,
pullis suis non struit nidum, mollius ut cubeat,
sed incommodis commodius exerceantur.

Illustrissimus olim, & Magnificus Dominus,

PRÆCLAVS STEPHANVS SZEMBEK,

Castellanus Woynicensis, &c.

Heroicam Polonorum Legem à Romanis transumptam,
fortia agere & pati,

vel in Panathenæis Palladis observavit.

Aspero in colle habitantes Camænas, indefesso adiit passu,
Erudita otia omnibus negotijs prætulit:

in ludo literario seria tractans,

Catonis animum præsetulit.

Nunquam illum Roma Nostra malè præcinctum vidit,
in Aurora ostendit,

qualem diem in Poloniæ Polo factorus erat.

Vnde Cracius Apollo non vanus augur erat,
Eum, inter Patres Poloniæ Conscriptos Tullium futurum;
qui adhuc in gremio Musarum, digna Senatu d.xit, & egit.

Quidquid Colophonios & Areopagitas sapit;
id mente volutabat, vultu monstrabat.

In ipsis fundamentis, Heroici animi molem posuit,
in brevi consummatus, & seipsum excedens.

Hoc fastigium inculcat penna,
ut scias, quales quantosq; Viros, Craciæ Athenæ,
ad togam sagumq; erudiverint.

Nam & Milciades Noster,
à silentijs Musarum eruditus,

ad armorum strepitum animosior convolavit.

Sub Cognatis WIELOPOLSCII Signis,
in tyrocinio Veteranum egit SZEMBECIVS.

Exercitum assiduis prælijs & victorijs, hic tantum Eum ambigit,
qui æterna esse in Polonia bella ignorat.

Nempe Poloni Gradivi Soboles,

nè gentibus invisibilibus in prædam cedant,
dormientibus Philippis,
vigilantes ordinant Antipatros.
Nostris certè periculis, alij securi,
nostris ruinis stantes,
nostris infortunijs fortunati.
Ad hoc enim Antemurale Christianitatis,
primò subsistunt, & suâ mole obruuntur barbari.
Contra hos Centauros
Pegasi WIELOPOLSCIANI ope,
toties volavit ad victorias
Bellerophon, Vir innocentiae SZEMBECIVS,
quoties Ioves Poloni permisere.
Leonidam dixisses,
qui suis vulneribus, salutem Patriæ reparare anhelavit.
Clipeum Se Patriæ noverat,
ROSIS Coronatum,
quæ, nè inter ardores bellorum arefcerent,
hostili sanguine eas irrigavit.
Felix Polonia foret,
si ex utroq; ejusmodi Cæsares haberet.

VESTIGIUM III.

Religionis intemeratæ, justique æquique observantia.
Orbis capulari senio deformis, cur insaniat?

Tripodem ne fatiges.
In præceps exitij ruit, hic OEdypodes,
quia in Patrem Matremq; impius est.
Liberam olim fuisse Gigantomachiam, vetus commentum est,
sed tamen punitam.
Hodie audacior Phlægra,
Cælum ipsum petit stultitiâ,
veriolemq; Iovem deturbare nititur,
& fulmina non torquentur.
Furentes Phlygæ Superos contemnunt,
sanctioris Berecynthiæ viscera rodunt,
genimina viperarum;
& Solones Legem contra tales parricidas non rogant.

Exala-

Exclama Tulli! ô tempora; ô mores!
 novi Catilinæ & Cethegi capita factionis;
 Capiti Orbis ruinam moliantur.
 Præter Hæresum Lænam,
 nova monstra prodeunt, Libertini.
 Proh inversus Themidis Ordo!
 olim ex servis Libertini fiebant;
 hodie ex Libertinis mancipia Plutonis.
 Creditur & vivitur ut libet, non ut licet decetq;
 ô præclara Libertinorum privilegia!
 quibus tam stolidè pereundi datur facultas.
 Huc ades ostentum informe, cui lumen ademptum!
 palpa Vestigia S Z E M B E C I I.
 Hanc ille licentiâ non ad Latomias modò,
 sed ad Tarpeium saxum & Gemonias scalas damnaret.
 Religionem salutis Auspicem,
 tam impenso studio coluit; ut vitæ anteferreret.
 Tunc se Lacone liberiolem censuit;
 cùm maximè Deo, Ecclesiæ, legi, subjectus esset.
 Novitatum Sæculi alter Cato,
 Fidei veræ Assertor,
 sine illa, ut animas salvaris
 ita Regna stare non posse, aiebat.
*Quoties enim mota est Religionis anchora,
 toties periclitabatur Reipublicæ navis.*
 In sacris tutandis Numa,
 ne quidem putu Ecclesiasticam immunitatem læsit.
 Exosus illos Salustios,
 qui, cùm nec teruntium in Divorum pulvinaria impenderint,
 opulentiam Mystrarum, aculeatis Philippicis exprobrant.
 Volupe Ipsi erat,
 Sacris Familijs præsertim Minoriticæ,
 non dici, sed esse Mecænatem.
 Sed, cùm Religionis Mater Iustitia sit,
 Sacras illius lances, Phœcionis more,
 ubiq; adhibebat, non sinè sale.
 De cælo descendisse diceres Astræam,
 incorruptâ tanti Senatoris conscientia illectam.
 Toties in Areopagis Lechiæ Iudex,

in Commiffione Leopoliensī Arbitr,
Rhamnufium egit.
Sæpius tamen Ejus arbitrio,
Iuftitia & pax osculata ſunt;
quia juratus rabioſi jurgiꝝ hoſtis,
ſvavioribus æquitatis remedijs omnia componebat.
Quidni igitur Coronam Ei dederit Juſtus Iudex?
qui, ita Curſum vitæ ſuæ conſummavit;
ut fidei & juſtitiaꝝ tanta Veſtigia relinqueret.

VESTIGIUM IV.

In publicis Conſilijs & Converſatione ſinceritas, amor
apud Ordines & æſtimatio, ac exinde cum OPOCIANA
Familia Colligatio.

Anima Reipublicæ Conſilium,
in cordenè an in cerebro ſedem fixerit?
Sanior Politia litem dirimat:
mihi tamen Regia Cordis magis arridet,
Spirituum Vitalium & amoris Officina.
Appage Cerebrosos Conſiliarios,
qui in duabus Sellis ſedent,
pallium omni vento obvertunt.
Veri Chamalæontes,
utriuſq; fortunæ auram captant.
Nec Cælites, nec Terrigenas illos dixeris,
qui uno oculo Cælum, altero Terram ſpectant.
O Vertumnosos Conſultores!
quorum hodie ferax ſæculum:
qui præferunt Regionem Religioni,
Regnum fidei, Rempublicam Eccleſiaꝝ Principem Chriſto,
terrena caeleſtibus.
quibus partes Cæſaris & Pompeij ſequi, ſolenne eſt.
omnium temporum & horarum homines,
bicipites Amphisbenæ.
Talem olim rorido vultu ſuſpexit Orbis Iulianum,
qui, cum Constantino & Chriſtianis erat Chriſtianus,
cum Gentilibus Gentilis:
modò palliatus, modò rogatus.

Non admisit hos Chamalæonteos colores,
Purpura Senatoris **SZEMBECII**.
Semper integrum & cum bonis ambulantem,
vidit Eum Polonia.

in Comitijis particularibus & Generalibus,
non pro domo sua, sed pro publico bono Tullius.
Tiberiana ænigmata nunquam locutus in voto.

Consonum legibus suffragium,
Sphynge non indigebat.

Primus se jurejurando obstrinxit
sub tempus Interregni,

sine auro, pro aureo PRINCIPE suffragaturum.

Palatinatûs Cracoviensis Cor & Anima,
dictis regebat animos, pectora mulcebat.

Integritatem Viri, omnes venerati & admirati,
Legionarium suum, pro electione,

Serenissimi & Invictissimi AVGVSTI II.

Voto nullius refragante, elegerunt.

De Platone olim prodidit adulatio;

si Dij cum hominibus loquerentur;

Plato aut interpres esset, aut eloquium commodaret.

SZEMBECIVS ROSAS Veritatis locutus,
sine aculeis tamen;

humana excessisse videbatur.

Inter tot discolos animorum sensus, concors in Eum Votum,
ut primas functiones in Palatinatu obiret.

Vir ex asse communicabilis,

neminem à facie Sua tristem dimisit.

Hinc, præcellis in Polonia Familijs associatus;
firmiorem in **SCVTATA OPOCIA DOMO** fixit amorem.

O & præsidium & Dulce Decus Patriæ,

SCUTUM OPOCIORUM!

Primam Hospitem in Polonia Coronam, salutasti & defendisti.

Boleslao Chabri Herculi Sarmatico,

post devictos triumphatosq; Cassubios, Moravos,

Prussos, Russos, Saxones,

Columnas ad Balticum mare ponenti, præsidio fuisti.

Geminæ jam elapsæ trieterides seculorum,

ex quo publicos in usus fervaris, quia Patriam servasti.

O Parma nulli penetrabilis ferro!

quâ armati Persei Sarmatici,

hostes præ metu in saxa rigescere fecerunt.

O cælo delapsum Ancile!

Lechicum Pompilium armans & ornans,

Illustrissimum olim & Magnificum Dominum,

D. PETRUM de OPOKA OPOCKI,

Castellanum Visliciensensem,

PODŁĘSCIIS, MARCHOCCIANIS, PEKOSŁAVIANIS, TVL-

KOWSCIANIS, LIPOWSCIANIS, HANKOVIANIS Chrysaëpidis stipatum:

Qui sub OSTROGIANA CRUCE

Thracium Ilium oppugnavit & expugnavit.

in Te Lechica Pallas,

Illustrissima & Magnifica Domina,

MARIANNA de OPOKA,

memorati Bellatoris Filia, nunc mæstissima Niobe,

SZEMBECIVM, Socium Vitæ, & Cor cordis sui excepit.

Per Te o SCUTUM TRIUMPHALE reptantes,

Illustris & Magnifici,

FRANCISCUS, & STANISLAUS SZEMBECII,

Magnæ spei Filij, in Scipiadas adolescunt,

Geminæ quoq; Pulcheriæ,

ANNA, & ELISABETH,

à Te Masculam Virtutem desumpsere.

Porro Tu Fama,

in OPOCIO Scuto scribe ROSEOS characteres

gloriæ SZEMBECIANÆ,

& in morte Magnum SENATOREM, proclama immortalem,

quia magnis in operibus Superstitem.

VESTIGIUM V.

Fidele Serenissimis Regibus Poloniæ

IOANNI III. ad Viennam Victori,

AVGVSTO. II. Coronam prensanti.

Corrupto ævo, quo laus à crimine sumitur,

Sanctissimum generis humani bonum, FIDES;

Phænice rarior est.

Olim fideles Zopyri;

Non unam Babylonem Dario quæsierunt,

hodie Regna eripiunt;

quibus etsi aurea labia aptaveris,
fraudes tamen & dolos loquuntur.

Thyësteo Convivio digni,

qui amici sunt tantum mensæ.

quibus, quò majora beneficia præstiteris,
eò magis irritantur.

Non alit hujusmodi Sinones,

Sedes candoris,

S Z E M B E C I A D O M U S,

Polonorum elogium:

REGEM posse securè dormire in sinu cujuslibet Civis,
vel ipse jure sibi usurpârit;

PRÆCLAVS STEPHANVS

S Z E M B E K

Castellanus Woynicensis, &c.

Triumphator Triumphatorum,

IOANNES III.

R E X P O L O N I A R U M,

Alcides Sarmaticus,

Cùm Hydræ Orientali ad Viennam capita abscinderet,

Hunc Theseum Comitem habuit,

non spectatorem, sed Bellatorem.

Periculum Vitæ præsentissimum,
postposuit periculo totius Christianitatis.

Prodigus Vitæ,

si illam profundere potuisset.

Quanta Virtus Regis! quanta & Civis!

dum proximus ardet Vcalegon,

ignem, etiam sanguine velle extinguere.

Hodie propria Domus Vulcanum alit,

& nemo vel stillam in tantum incendium fundit.

SERENISSIMUS & INVICTISSIMUS
AUGUSTVS II.

Cælo planè Polonis demissus ab alto,
à SZEMBECIO, primum in limitibus Regni,
deinde ad Metropolim salutatus;
Ejusdem Candori, Vitam, Honorem, Diadema,
& Urbem commisit.
Non invidemus Athenis integerrimos Zenones,
apud quos Claves Urbium deponebant:
sub SZEMBECII fideli tutela
securior fuit Fortuna Regni.
Habuerint Tiberij suos Sejanos,
SZEMBECIVS, Coronato Capiti ita adhæsit,
ut exemplo suo plures adhærere fecerit.
*Nihil enim magis fatale est Corpori Republica;
quàm si membra à capite dissenserint.*
Idem publici Boni amor,
componendis motibus intentus,
etiam Radomscensis Commissionis arduum negotium,
suscipiendum Illi facilè persuasit.
O Polonæ Majestates!
nullum Serenitatem Vestram obumbraret nubilum;
si tale sudum & candorem mentis
omnes explicarent.



DIALOGISMUS

VATIS ET LIBITINÆ.


Q Væ Tibi fatiferis truculenta potentia Regnis
Est data? quæ rabies? furijs comitata malignis,
Ah miserum dictu, quàm lamentabile mundo
Invehis exitium, moriendi mille figuras!
O Libitina ferox! pullato Syrmate Regum,
Purpureos mutas trebro properata decores,
Officis pedibus, Soliorum culmina calcas;
Funereasq; facès gestando, nefanda serenos
Extingvis vultus, fasces, diademata, summis
Regibus ex manibus tollis, torquesq; supremo
Vertice. Quid vastum præceps spatiata per Orbem,
Non tentas violenta diu? Grandæva Senatûs
Majestas, haud tuta manet; conclavè Sacratum
Ingredieris, rumpens suffragia docta Catoni.
Cecropias arces, ubi Romulidumq; Curules
Invadis, consulta silent Oracula Patrum.
Scandit Victor ovans, Capitolia celsa Leone;
Explicat immensos Cæsar post bella triumphos;
Hunc nedum occiduus reverenter Phæbus adorat;
Nedum belligeros Araris Rhodaniq; potores
Victos ac vinctos ducit; Tartessia tellus,
Magnanimis opulenta Viris, pretiosa metallis,
Victori fit præda suo, penditq; tributa,
Extremiq; ruunt portantes dona Britanni;
Ast & Roma Caput mundi Sedesq; Gradivi,
Sanguinei tremebunda veretur Cæsaris iras:
Sed præcelsa diu Cajum tenuitnè superbum
Gloria? terribilem misereri nescia, falcem,
O Mors vibrâsti! cæsus Cæsar, jacet, armis,

Lauriferis miserè spoliatus, mansit oburno
Detrusus folio, fatorum ac ipse trophæum.
Pompeius struxit pompas, Orienteq; toto,
Contribuente tulit Romanas Victor in arces
Quantas exuvias? Spectacula rara triumphi
Exhibuit? nedum victos post terga Monarchas,
Ostentans gentes, Fluvios, castella, lacusq;
Sed quod tunc orbis stupuit, stupuitq; Quirina
Maiestas: montes auratos prætulit ante
Gemmiferos currus, vexerunt quos elephantes.
Ast, ô quàm lætos lethum mutare triumphos
Nôsti! flebilibus luxit sua funera lassis
Pompeius, Victor victus, ceciditq; premente
Fato: *Sic tantos humana negotia motus
Alternatq; vices miscent; hoc turbine fertur
Victorum lethalis honos; laurosq; Cupressi
Oppressere: cadunt crudeli morte Tyranni.*
Et bene non parcunt Parcæ, Nemesisq; superbis;
Quos Patriam miscere juvat, Civilia bella,
Fatalesq; placet persæpè ciere Philippos.
Ast ROSA delictum Pæsti, Reginaq; florum
Flos Regum, Augusto meritorum murice dives,
Quid nocuit, Lechicæ triplex Cynosura Salutis!
Cui nocuit Patriæ decus atq; corona Senatûs?
Hostes duntaxat Cuius pungebat acumen;
Cuius odoratum solus Scarabæus abhorret
Cælesti ambrosiâ plenum; quam Purpura vestit,
Innocuusq; rubor, verecundo fulget ab ore.
Heu gemmas florum Lachesis succidis acutâ
Falce! nec immitis croceum vernare ROSETVM
Permittis! Sævos tantum plantare dolores,
Ah consuetâ diu! potuisti funus acerbum
Longius in spatium differre; celebrior ævo
Floreret Lechicus Nestor, ROSEVSq; Senator.

Desi.

Desine luctificos questus geminare Póeta;
Improperas fatis: (inquit Libitina) solutos
Quæ curis homines tollunt super æthera, ducunt,
Heroum Manes meritos, cumulantq; perenni
Vitâ, & honore novo; quos in Capitolia Cæli,
Augusto terris revehunt augmentq; triumpho.
Iam matura Polo ROSA, sat radiavit in Ostro
Arridens superis, in amæna ROSARIA Cæli
Transplantanda fuit; Meritorum murice postes
Sidereos ornat, durando sæcula vincens,
Iam Boream sæcli ridet brumæq; rigores.
Incolit Elisios Campos, æterna salutis
Regna tenet; miseras trepidâ formidine mentes,
Nullus vbi cruciat luctus, nec mordet anhelum
Sollicitudo Caput. Vester STEPHANVSq; coruscum
Iam Stephanoma capit; supremâ voce precatus
Heroum Genitrix, Divûm Berecynthia Mater
Terra Polona Tibi, solatia mille, triumphos
Innumeros; secura quies & nescia belli
Sarmatiæ redeant vt sæcula, priscaq; Virtus.
Rex AVGVSTE Tuis Victoria prospera factis
Advolet, hostiles felix superare phalanges
Vt valeas; melior faveat fortuna Polonis
Hercule sub tanto; bellorum monstra quiescant.
Vobis ô Proceres Magni! Collega Senator
SZEMBECIVS, Votum mortali mittit ab Vrna;
Vivite felices, Patriæ, Lechiq; Penates
Consilio fulcite piô, communèq; Regni
Instaurate Bonum, cordisq; reponite fibris.
Et Tibi Cujaviæ PRÆSVL, Germaneq; compar
Quas referam grates? quòd tantum munus ad aras
Obtuleris, Superos pro me placando. Secunda
Cuncta Tibi veniant; Pilio prolixior ævo
Vivas ad summos faustè provectus honores.


Cum verò OPOCIÆ, proscindit viscera Nymphæ
Vulnificus mæror, socialia vincula rumpens:
Hoc solamen Ei Conjux in corde superstes
Mittit & ingeminat, niveo de pectore voces:
Vive valeq; diu Lechiæ Cornelia, fidum
Præsidium, fulcrum vitæ, tutela salutis.
In longum formosa vale, nec tristibus aures
Ac auras Niobes mæstæ ploratibus imple.
Tolle ROSAS, quas linquo Tibi, solatia cordis,
Pignora lætitiæ, Columnen, spem, suscipe Natos,
O Fili FRANCISCE, sequi vestigia cures,
Hæc, quæ signo Tibi; ROSEO STANISLAE calle,
Ocyus ad Collem probitatis, tendite dextri.
O præclara vale FRATRVM Vireasq; Corona!
Et consanguineus nexus, signumq; ROSARVM
Quos junxit, valeant, valeat bene Patria. Dixit.



u
e.
M
o-
m
o
es
er
ne
a-
ut

o
e-
y-
ti-
e-

o.
e.
e.



PP

22000,-

3.XII.13



Bibliotheca
P.P. Camaldulensium in Bielany

Depozyt w Bibliotece Jagiellońskiej



02350

